

25.09.2024

UKA2024/21

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata allangortinneqarnera pillugu Inatsisartut inatsisissaattut siunnersuut (Nunap immikkoortuini akitigut naligiissaarisoqarnissaanut aamma ajunaalernermi isumannaallisaanikkullu sullissiffiusut annertusineqarnissaanut akuersissummik pigisaqartunut peqqusinissamut tunngavissaq

(Ineqarnermut Attaveqaasersuutinullu Naalakkersuisoq)

Siunnersuummut soqutigintumut Siumumiik imatut oqaaseqaateqassuugut:

Nunarput isorartooq imaatigut nunakkullu annertuumik angallavisoq eqqarsaatigalugu pinngitsoorsinnaangilarput sapinngisamik ukiuni aggersuni attaveqaatitigut isumannaallisaaneq eqqarsaatigalugu siammassinnerusumik atortuutitigut innuttaasut atuinerunissaata aqutissiuunneqarnissaa, tassungalu ingerlanissarput tunngaviatigut Siumumiik aqutissiuussisoqarnissaanut ataavartumik suliniuteqartoqarnissaanut tapersersuijuassaagut.

Naalakkersuisut saqqummiussaaticigut erserpoq isumannaallisaanikkut atortuutit annertunerusumik atorneqaleriartortut InReach-tit tunngaviumik unioqqutitsinerunngitsumik atorneqartarnissaata aqutissiuunneqarnissaa uani inatsisit allangortinnerisigut anguniagaasoq, tamannalu tamakkiisumik ilalerlutigu.

Atortuutit assigiinngitsut sumiiffinnik nalunaarsinnaasut atugaanerulernissaat assut kissaatigaarput, tamatuma ilaatigut ajoraluartumik ujaasisoqartariaqalerneranik pisoqartarnerata ilaatigut pinaveersaartinneqarsinnaanera takusinnaagatsigu.

Minnerunngitsumik sullissinerni akuersissuteqarfiusuni nunap immikkoortuini akitigut naligiissarinissamut Tusassimut peqqusinissamut tunngavissaq ilanngunneqarmat Siumup iluarisimaarpaa. Taanna aqutigalugu nunatsinni attaveqaasersorsimanikkut akitigut assigiissaarisarnissaaq periarfissaalissaaq, soorlu Nukissiorfimmuut taamatuttaaq aqqissuussisimanerput assigalugu.

Taamatut oqaaseqarluta siunnersuut tunngaviatigut taperserlugu, ataatsimiititaliamut susassaqartumut ingerlateqqipparput.

Jens Kristian Therkelsen, Siumut